



**PRAVILNIK O DODJELI SREDSTAVA ZA SUFINANSIRANJE TROŠKOVA
ODLASKA NA EKSKURZIJU UČENIKA SLABIJEG IMOVNOG STANJA
ZAVRŠNIH RAZREDA OSNOVNIH ŠKOLA KAO JAVNIH USTANOVA
SA PODRUČJA OPĆINE ILIJAŠ**

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09) i čl. 56. i 107. Statuta Općine Ilijaš ("Službene novine Kantona Sarajevo", br. 20/09-prečišćeni tekst i 46/18), a u vezi sa tačkom 5. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 37/24), Općinski načelnik donosi

PRAVILNIK O DODJELI SREDSTAVA ZA SUFINANSIRANJE TROŠKOVA ODLASKA NA EKSKURZIJU UČENIKA SLABIJEG IMOVNOG STANJA ZAVRŠNIH RAZREDA OSNOVNIH ŠKOLA KAO JAVNIH USTANOVA SA PODRUČJA OPĆINE ILIJAŠ

I – OSNOVNE ODREDBE

Član 1. (Predmet)

Pravilnikom o dodjeli sredstava za sufinansiranje troškova odlaska na ekskurziju učenika slabijeg imovnog stanja završnih razreda osnovnih škola kao javnih ustanova sa područja općine Ilijaš (u daljem tekstu: Pravilnik) utvrđuju se cilj, kriteriji i način dodjele budžetskih sredstava, obaveze korisnika sredstava Općine Ilijaš (u daljem tekstu: Općina) za sufinansiranje troškova odlaska na ekskurziju učenika slabijeg imovnog stanja završnih razreda osnovnih škola kao javnih ustanova na području Općine (maturantska ekskurzija).

Član 2. (Definicije)

(1) Ekskurzija predstavlja oblik odgojno-obrazovnog rada koji se ostvaruje kroz višednevna putovanja i boravak učenika osnovne škole u pratnji zaposlenika škole, koje organizuje i realizuje škola u saradnji sa turističkom agencijom i koja kao takva obavezno uključuje "turistički paket/aranžman" i to radi posjete prirodnim, obrazovnim, kulturnim, sportskim, turističkim i tehničkim odredištima izvan sjedišta škole u skladu sa odgojno-obrazovnim zadacima, radi neposrednog proučavanja onih nastavnih sadržaja koji se ne mogu demonstrirati i uspješno tumačiti u učionici, a u skladu sa Pravilnikom nadležnog ministarstva.

(2) Troškovi odlaska na ekskurziju predstavljaju novčani iznos koji učenici završnih razreda osnovnih škola, odnosno njihovi roditelji/staratelji/zakonski zastupnici plaćaju turističkoj agenciji za odlazak na ekskurziju.

Član 3. (Cilj)

Cilj ovog programa je omogućavanje odlaska na ekskurziju učenicima slabijeg imovnog stanja. Ovim programom će se učenicima omogućiti sticanje određenih znanja, vještina i navika u skladu sa ciljevima i zadacima odgovarajućih programa odgojno-obrazovnog rada.

Član 4. (Rodno značenje izraza)

Izrazi koji se koriste u ovom Pravilniku, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

II – USLOVI ZA OSTVARIVANJE PRAVA

Član 5. (Korisnici sredstava i uslovi za ostvarivanje prava)

- (1) Pravo na dodjelu sredstava za ovu namjenu mogu ostvariti učenici završnih razreda osnovnih škola kao javnih ustanova sa područja općine Ilijaš:
- a) koji imaju prebivalište na području Općine u neprekidnom trajanju od 3 (tri) godine do dana podnošenja zahtjeva;
 - b) koji redovno pohađaju osnovnu školu,

- c) čija primanja po članu porodičnog domaćinstva ne prelaze iznos od 400,00 KM mjesečno.
- (2) Bez obzira na ukupna primanja domaćinstva, pravo na podršku ostvarit će učenici:
 - a) bez jednog ili oba roditelja,
 - b) sa invaliditetom
 - c) koji potiču iz porodice u kojoj se istovremeno školuje troje i više djece u osnovnoj i srednjoj školi.
- (3) Općina će sufinansirati troškove ekskurzije i u slučaju da se ekskurzija učenika završnih razreda realizuje na kraju školske godine, koja prethodi završnom razredu.

III – POSTUPAK, NAČIN DODJELE I IZNOS SREDSTAVA

Član 6. (Javni poziv)

- (1) Sredstva za podršku aktivnostima iz člana 4. ovog Pravilnika dodjeljivat će se na osnovu podnesenih zahtjeva, a u skladu sa objavljenim javnim pozivom.
- (2) Javni poziv se objavljuje na web stranici Općine Facebook i Instagram stranicama i ostaje otvoren do utroška sredstava planiranih za ovu namjenu u Budžetu, a najkasnije do 31. oktobra tekuće godine.
- (3) Zahtjev za sufinansiranje podnosi roditelj/staratelj/zakonski zastupnik, a dostavlja se Službi za društvene djelatnosti i poslove mjesnih zajednica (u daljem tekstu: Služba) putem protokola Općine.
- (4) Općina neće podržati zahtjeve koji su pristigli nakon realizacije ekskurzije.

Član 7. (Potrebna dokumentacija)

Uz zahtjev iz člana 6. ovog Pravilnika, podnosilac je dužan priložiti sljedeću dokumentaciju ne stariju od 3 mjeseca, u originalu ili ovjerenoj fotokopiji:

- 1. uvjerenje o kretanju za roditelja/staratelja/zakonskog zastupnika učenika;
- 2. potvrdu osnovne škole kao javne ustanove sa područja općine Ilijaš o redovnom školovanju učenika/ kandidata;
- 3. dokaz o troškovima odlaska na ekskurziju - predračun/ priznanica/faktura/ugovor sa turističkom agencijom iz kojeg se vidi iznos cijene ekskurzije, koji nadležna služba pribavlja po službenoj dužnosti od osnovne škole koju pohađa učenik/kandidat;
- 4. kućnu listu;
- 5. dokaz o ukupnim mjesečnim prihodima-primanjima podnosioca zahtjeva i članova njegovog domaćinstva po osnovu radnog odnosa, boračko invalidske zaštite, penzije, samostalne djelatnosti i drugih osnova;
- 6. potvrda škole o redovnom školovanju u osnovnoj i srednjoj školi članova domaćinstva navedenih u kućnoj listi;
- 7. za učenike čiji su roditelji nezaposleni – uvjerenje Službe za zapošljavanje Kantona Sarajevo;
- 8. za učenike bez jednog ili oba roditelja - Izvod iz matične knjige umrlih za roditelja/e;
- 9. pravosnažno rješenje o utvrđenom stepenu invaliditeta (za učenike sa invaliditetom);
- 10. izjava da je roditelj/staratelj/zakonski zastupnik saglasan da se lični podaci učenika obrađuju i koriste isključivo u svrhe obrade prijave na javni poziv, a u skladu sa važećim Zakonom o zaštiti ličnih podataka – izjava ovjerena pred općinskim organom uprave.

Član 8. (Postupak dodjele sredstava)

- (1) Dostavljeni zahtjevi će se rješavati po vremenu prispjeća.
- (2) Služba će u roku od 10 (deset) dana od dana prijema zahtjeva utvrditi da li su ispunjeni uslovi za dodjelu sredstava.
- (3) U slučaju ako je dokumentacija nepotpuna, Služba poziva podnosioca zahtjeva da je dopuni u roku od 5 radnih dana.
- (4) Konačnu odluku o dodjeli sredstava, u formi rješenja, donosi Općinski načelnik.
- (5) Podnosilac zahtjeva može podnijeti prigovor Općinskom načelniku u roku od 8 dana od dana prijema rješenja.
- (6) Rješenje o prigovoru Općinski načelnik donosi u roku od 8 dana od dana podnošenja istog.

- (7) Po pravosnažnosti Rješenja Općina će sa odabranim korisnikom sredstava zaključiti ugovor o međusobnim pravima i obavezama namjenskog utroška sredstava.

Član 9. (Iznos sredstava)

- (1) Maksimalni iznos (neto) sredstava koji se može dodijeliti po podnesenom zahtjevu je 250,00 KM za učenike završnih razreda osnovnih škola.
- (2) Ukoliko je iznos troškova odlaska na ekskurziju manji od iznosa navedenog u stavu (1) ovog člana, Općina će financirati iznos stvarne cijene ekskurzije koja se dokazuje predračunom/priznanicom/fakturom/ugovorom sa turističkom agencijom;
- (3) Odobrena sredstva se jednokratno uplaćuju na račun roditelja/staratelja/zakonskog zastupnika učenika.

IV – OBAVEZE KORISNIKA

Član 10. (Obaveza korisnika sredstava)

- (1) Korisnik je dužan obavijestiti Službu o svakoj promjeni koja može utjecati na finansiranje/sufinansiranje troškova odlaska na ekskurziju u roku od 30 dana od dana statusne promjene (promjena škole, ispisivanje učenika iz škole, neodlazak na ekskurziju i sl.).
- (2) Poštujući načelo javnosti škola, koja obavlja odgojno-obrazovnu djelatnost kao djelatnost od posebnog interesa, treba Općini, na njen zahtjev da omogući transparentan uvid u postupak planiranja, organizacije i realizacije ekskurzije, kao oblika odgojno-obrazovnog rada koji je predmet ovog Pravilnika.

V - PRAVDANJA SREDSTAVA

Član 11. (Pravdanje sredstava)

- (1) Korisnik sredstava je obavezan da u roku od 30 (trideset) dana nakon realizacije planiranih aktivnosti dostavi dokaz o uplati sredstava odabranoj turističkoj agenciji.
- (2) Prihvataju se samo oni troškovi ekskurzije koji su nastali nakon potpisivanja ugovora.
- (3) Korisnici koji ne iskoriste ili ne opravdaju sredstva na način propisan stavom (1) ovog člana, dužni su izvršiti povrat dodijeljenih sredstva na račun Općine.

VI – PRELAZNE I ZAVRŠNE ODREDBE

Član 12. (Stupanje na snagu)

Ovaj Pravilnik stupa na snagu narednog dana od dana objavljivanja na Oglasnoj ploči Općine, s tim da će se naknadno objaviti u „Službenim novinama Kantona Sarajevo“.

Broj:01/2-11-1448/2025

Iljaš, 18.06.2025. godine



OPĆINSKI NAČELNIK

Amir Džodžija

Obrazloženje

I Pravni osnov

Pravni osnov za donošenje ove Pravilnika je:

- član 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09)
- čl. 56. i 107. Statuta Općine Ilijaš ("Službene novine Kantona Sarajevo", br. 20/09-prečišćeni tekst i 46/18) kojima je određeno da je Općinski načelnik izvršno-upravni organ općine i nadležnost Općinskog načelnika za donošenje pojedinačnih i općih akata iz samoupravnog djelokruga općine.
- tačkom 5. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“ 37/24) definisana je obaveza primjena Smjernica od strane lokalnih zajednica.

II Razlozi donošenja

Nakon završetka osnovnog obrazovanja, veliki broj učenika nije u prilici da obezbjedi sredstva za odlazak na ekskurziju, te na taj način sa svojim vršnjacima obiđe interesantne destinacije u Bosni i Hercegovini. Naime, tim učenicima je uskraćena mogućnost da se druže, steknu nova znanja, te razmjena iskustva sa svojim vršnjacima.

U cilju obezbjeđenja pretpostavki da svi učenici, bez obzira na njihov imovinski status, odu na ekskurziju, u Budžetu Općine Ilijaš obezbjeđena su sredstva za sufinansiranje troškova ove aktivnosti.

Također, Smjernicama o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“ 37/24) definisani su minimalni standardi dodjele budžetskih sredstava koje budžetski korisnici dodjeljuju putem transfera i subvencija za finansiranje zakonski utvrđenih prava, programa I/III projekata drugih nivoa vlasti, neprofitnih organizacija i pojedinaca, kao i obavezu primjene istih od strane lokalnih zajednica.

U cilju jasnog definisanja uslova za ostvarivanje prava, te usklađivanja postojećih akata sa navedenim Smjernicama, pristupilo se izradi ovog Pravilnika.

III Obrazloženje predloženih rješenja

- Član 1. definiše predmet regulisanja Pravilnika;
- Član 2. data je definicija ekskurzije;
- Član 3. definiše cilj ekskurzije;
- Član 4. utvrđuje rodno značenje izraza;
- Član 5. definiše korisnike sredstava i propisuje uslove za ostvarivanje prava;
- Član 6. definiše obavezu raspisivanja javnog poziva;
- Član 7. propisuje potrebnu dokumentaciju;
- Članom 8. definisan je postupak dodjele sredstava i način podnošenja prigovora;
- Članom 9. definisan je iznos sredstava koja se mogu dodijeliti po podnesenom zahtjevu;
- Članom 10. propisana je obaveza korisnika sredstava;
- Članom 11. propisana je obaveza pravdanja dodijeljenih sredstava, kao i način pravdanja;
- Član 12. utvrđuje način stupanja na snagu ovog Pravilnika.

III Finansijska sredstva

Sredstva za sufinansiranje troškova ekskurzije obezbjedit će se u Budžetu Općine Ilijaš.